

(Aus Harbach's Harfe.)

DAS ALT SCHULHAUS AN DER KRICK.

Heit is 's 'xäctly zwanzig Johr
Dass ich bin owwe naus ;
Nau bin ich widder lewig z'rick
Un schteh am Schulhaus an der Krick,
Juscht neckscht an's Dady's Haus.

Ich bin in hunnert Heiser g'west,
Vun Märbelstee' und Brick,
Un alles was sie hen, die Leit,
Dhet ich verschwappe eenig Zeit
For's Schulhaus an der Krick'.

Wer mied deheim is, un will fort,
So loss ihn numme geh'—
Ich sag ihm awwer vorne naus
Es is all Humbuk owwe draus,
Un er werd's schwert seh'!

Ich bin draus rum in alle Eck',
M'r macht's jo ewwe so ;
Hab awwer noch in keener Schtadt
Uf e'mol so viel Freed gehat
Wie in dem Schulhaus do.

Wie heemelt mich do alles a' !
Ich schteh, un denk, un guck ;
Un was ich schier vergesse hab,
Kummt widder z'rick wie aus seim Grab,
Un schteht do wie en Schpuck !

Des Krickle schpielt verbei wie's hot,
Wo ich noch g'schpielt hab dra';
Un unner selle Hollerbisch
Do schpiele noch die kleene Fisch,
So schmärt wie selli Zeit.

Der Weissescheht noch an der Dhiere-
Macht Schatte iwwer's Dach :
Die Drauerank is ah noch grieh'—
Uns Amschel-Nescht—guk juscht mol hi'
O was is des en Sach !

Die Schwalme schkippe iwwer's Feld,
Die vedderscht is die bescht !
Un sehnscht du dort am Giebeleck
'N Haus vun Schtopple un vun Dreck ?
Sell ich en Schwalme-Nescht.

Die Junge leie allweil schtill,
Un schlofe alle fescht.
Wart bis die alte kriege Werm
No'd herscht du awwer gross Geleerm—
Vun Meiler in dem Nescht !

Ja, alles dess is noch wie's war
Wo ich noch war en Buh ;
Doch anner Dings sin net meh so,
For alles dhut sich ennere do
Wie ich mich ennere dhu.

Ich schteh wie Ossian in seim Dhal
Un seh in's Wolkeschpiel,—
Bewegt mit Freed un Trauer—ach !
Die Dhrene kumme wann ich lach !
Kanscht denke wie ich fieleh.

Do bin ich gange in die Schul,
Wo ich noch war gans klee';
Dort war der Meeschter in seim Schtuhl,
Dort war sei' Wip, un dort sei Ruhl,—
Ich kann's noch Alles seh'.

Die lange Desks rings an der Wand—
Die grosse Schieler d'rum ;
Uf eener Seit die grosse Mäd,
Un dort die Buwe net so bleed—
Guk, wie sie piepe rum !

Der Meeschter watscht sie awwer scharf,
Sie gewe besser acht :
Dort seller, wo lofletters schreibt
Un seller, wo sei Schpuchte treibt,
Un seller Kerl wo lacht.

Die Grose un die Kleene all
Sin unner eener Ruhl ;
Un dess is juscht der rechte Weg :
Wer Ruhls verbrecht dernimmt die Schleg
Oder verlosst die Schul.

Inwennig, um der Offe rum
Hocke die kleene 'Tschäps,
Sie lerne artlich hart, verschteht,
Un wer net wees sei' A B C—
Sei' Ohre kriege Rääps.

S'is hart zu hocke uf so Benk—
Die Fiess die schteh'n net uf—
En Mancher kriegt en weher Rick
In sellem Schulhaus an der Krick,
Un fiehlt gans krenklich druff.

Die arme Drep ! dort hocke se
In Misserie—juscht denk !
Es is kee Wunner—nemm mei Wort—
Dass se so wenig lerne dort,
Uf selle hohe Benk.